

書名 皇明文衡一百卷 正德五年序刊本
撰者 明 程敏政 輯, 明 范震、李文會 校

卷 卷八十八
內容分類 集 總集 各代 明
索書號 大木 集部 總集類 30
編號 D7861500

彩色首頁1

東洋文化研究所漢籍目錄 編號: D7861500

東洋文化研究所漢籍目錄所藏漢籍善本全文影像資料庫 索書號: 大木 集部 總集類 30

漢籍善本全文影像資料庫文本 皇明文衡一百卷 正德五年序刊本

版權所有: 東京大學 東洋文化研究所

使用上的注意事項

卷八十八

代言檄

原檄

宋濂



翰林院學士新安程敏政選編
鄉進士國子監助教永康范震校正
賜進士應天府儒學教授郊郢李文會重校



皇明文衡卷之一




皇明文衡卷之八十八

墓誌銘

北京行太僕寺卿兼苑馬寺卿楊公墓誌銘

胡儼

公諱砥字大用姓楊氏世居澤州之南村曾大父誥大父禎
父伯新皆居鄉里為善士公自幼秀穎與羣兒處必習禮讓
進退容止若成人長老見多異之年十歲入州學為生徒卽
知務學既長學無遺遂充貢為太學生洪武甲戌登進士第
擢授大行人副嘗上疏言孔廟從祀宜退楊雄進董仲舒有
功名教諭三載陞湖廣布政司左叅議舉賢能恤鰥寡去貪
暴吏民懷服歲庚辰以言事謫居遼陽及
上龍飛特起授鴻臚寺卿時父已喪乞終制歸廬墓側日夕



哀慟人不忍聞永樂二年起復為禮部左侍郎後以巡視河道坐失職降工部營繕主事又調禮部主客主事八年春扈從北征典功賞有勞勩十年二月受命詣北京簡閱馬騎還遂授行太僕寺卿明年又兼苑馬寺卿而公於馬政竭心盡職往來畿甸之間監牧攻駒馬大蕃息至於有司政令之得失民情休戚之所關知無不言由是寵任益隆十五年十一月丁母夫人司氏憂護喪歸葬特蒙恩賜鈔千錠道塗給力役行次澤州之黃華里去家近一舍以悲哀匍匐得疾寓于勝因寺明年正月己巳竟卒享年五十有四訃聞上悼惜之遣官諭祭三月庚申葬于州城之東南村之原祔先塋也配焦氏子男二人長璞次瓚女一人適李貴銘曰惟楊氏出自晉始伯儕衍厥胤歷秦漢徵復盛炳公卿襲華慶迄于今世晉城賁雖遙系乃明公挺生揚休聲著政績流德馨澤之東南村岡浮山鬱龍門蒼珏峯秀丹水長宅茲幽公之藏百千祀永不忘

嘉議大夫北京行部左侍郎劉公墓誌銘

北京行部左侍郎劉公既卒其孤徵以予與公故乃寓書奉狀來求墓銘按狀公諱辰字伯靜姓劉氏其先沛人後徙鄆遷婺之金華則自公之曾祖三顧始也三顧仕元為明台上萬戶府經歷幼鞠于舅王氏遂因其姓故公之祖文璜父志皆姓王氏至公復姓劉公慷慨負氣節喜立功業以表見于世初

王師親下婺州公首上謁署為典籤奉命使方谷珍谷珍令左右飾二姬以進公峻却之其人慚而退浙江左丞李文忠

開省于嚴辟公置幕下以資贊畫時元帥葛俊守廣信當祁
寒集下夫浚城濠民苦之欲為變文忠止之才聽遂怒欲臨
以兵公請往諭以大義俊即悔悟謝文忠意乃釋既而提監
辦金華茶鹽官秩滿課最以親老歸養教授鄉閭嘗道遇故
人李惟中死於逆旅具棺斂瘞之任其母喪不舉遺金葬之
未幾二親繼歿執喪哀毀不勝衣所居室廬僅蔽風雨饘粥
或不繼處之裕如也里人劉十八懷金入城遇二卒圖其金
與飲醉之扶行水次欲加害公見力解之獲免後以懷不抱
德起為湖廣道監察御史臨江同知陳斌受賕及銀工盜金
皆坐死公為辯之得減死論居二年以謬謬聞擢知鎮江府
興廢舉墜勤於其政聞宋宗忠簡公墓在丹徒荒穢墓田據
於民即加封樹復其田命墓傍寺僧收田之入以主其祀丹

陽道接句容細民任負載者往往因日暮行劫行旅患之公
嚴為禁盜遂息郡有潁江田八十餘頃歲久淪沒仍責賦於
民公請于 朝除之京口閘廢舟楫不通東南漕運者轉新
河江陰二港以出江多為風濤阻溺公乃自京口至呂城百
二十里去淤塞甃石作壩修閘門順水勢之出入於是公私
便之然漕河源淺易涸每仰練湖以益水湖有三斗門亦廢
公又修築之三斗門成漕運之舟既通湖下之田益稔時浙
河轉輸之民道其境上元者為收瘞疾者給米命以小舟送
出境賴以活者數百人永樂元年夏六月以預修
國史知故實 賜白金文綺襲衣陞江西布政司左叅政至
則以久雨江水汎溢九江諸郡潁江之田皆勞饑民為盜富
室多罹其害公即檄郡邑勸富民出粟以貸饑者蠲其役以

當其息官爲之券約明年償本粟由是富者樂從饑者得食
南安贛州等九府荒田糧六萬餘石有司歲抑取於民民不
堪公以聞悉蠲其額後以同官坐事相連免歸永樂六年秋
命下復起爲北京行部左侍郎出特恩也公以老不任政
日被顧問留京師者二年乃易次官之奇少鉉致仕歸
踰年復驛召至京命督工武當未行疾作又賜鈔錠遣官
督醫給驛舟送還至常州毗陵驛遂卒實永樂十年七月二
十三日春秋七十有八孫祚奉柩歸塋文星門下閣塘先塋
之次是年冬十二月九日也娶陸氏董氏董氏元中書叅政
嘉訥女前四年卒陸氏有婦道子男二人微觀觀蚤世女二
人長適東陽施信厚東川軍民府經歷次適徐叔紹皆陸氏
出也孫三人祚祺禧女一在室予與公舊同史館知公爲人
直諒多聞而公亦以此自信有古節士風可尚已銘曰
不撓不汙而端其趨不激不隨而安以居恩榮始終而善
不虛嗚呼來祀欲知其人視此刻碣

王希範墓誌銘

永樂十八年三月辛未禮部儀制主事王希範卒予既弔哭
退其孤錫持狀來乞銘將歸塋納墓中以詒諸後予與希範
永樂初同被選擢入翰林又同日拜

恩命爲檢討時希範年甚少氣甚銳學通而才敏於人少許
可獨以余齒少長頗推讓相與幾二十年始終如一日今已
矣銘不可辭按狀希範諱洪曾祖德甫祖善父輝世居錢唐
希範生八歲卽知務學及冠入郡庠從訓導胡粹中授春秋
日記數千言無遺忘下筆爲文辭沛然有奇氣率所事所言

若老成人粹中大器之年十八舉進士任行人將命關陝得使職人賢之未幾陞吏科給事中遂爲檢討修大典爲副總裁滿考陞修撰又陞侍講三以大比典文衡取士甚公職侍講踰二年遷今官適尚書呂公巡行關陝凡部事悉委希範敷奏論事詳明同列敬服

朝廷方屬意希範而希範竟邁末疾以卒享年四十有一其疾也得賜藥物其卒也又得賜棺且給舟載歸

恩意隆至人莫及也初娶俞氏生子二人長卽錫次欽繼室劉氏前浙江按察僉事必榮之女生女一人寧奴希範之學月開日益淳蓄深博其爲文章務漸條刮剗以期至於古人而遽止於斯悲夫將以年月日葬某處銘曰

昏世強弱才也窮達壽夭也脩身俟命人也君子修其在已俟命於天而已希範勤一世以脩諸已而卒不施其命也夫其命也夫

前泰和州知州顧侯光遠墓誌銘

梁潛

泰和始爲州其民之衆亂久而後定治之尤難而

國朝初相繼爲之守者得二人焉曰吳侯去疾顧侯光遠也二侯皆一時豪士顧氏先世居河南自宋高宗南渡始徙而南居姑蘇之嘉定元末有知侯之材者辟爲掾京口及

太祖高皇帝下江南京首紐款侯有力其間遂從

高皇帝入金陵監大軍倉支納三年授江西行省理問從征陳友諒督饋運明年平陳氏擢知龍陽州時方甲辰年也招附懷來剷革宿弊民賴以息越二年改知泰和州龍陽老穉至號泣於道不忍侯之去至泰和龍州守卽吳侯也吳侯以

民好訟告於侯侯憮然曰民有冤抑守弗爲之理民將安訴
頃之訟者雨集侯乃自爲書榜聯紙長數丈誨諭諄切民爭
來觀觀已去不訟者十二侯又俾凡訟者居廳門上思三日
然後得訴思不三日去不訟者過半矣乃擇吏純謹者一人
置廳簿受訟詞而勾稽其未民誠負冤也輒爲疏理非誠負
冤願誨自止者聽不問未兩月民不復訟吏亦畏侯精敏無
敢舞文以病民境有虎適其時禁民私蓄兵民無所措訴于
侯侯爲草檄告之神虎一夕遁去州以大治以丁祖母憂赴
闕陞辭 命留翰林院同議編大明律律成上進復
命監造天下均工圖籍已而還服喪嘉定未幾起後授廣東
行省郎中二年 召拜 吳王府副相留京師以他事註誤
力逮繫間得疾飲水病結胸而卒臨卒爲詩壁間以慨道其

平生有白髮歸朝之嘆聞者悲之子存誠殯于都南門外三
里店侯諱某生元某年某月某日歿今洪武某年某月某日
娶某氏子四人長即存誠次存仁爲河南偃師縣令以歿次
存義存信存誠今居嘉定存義存信從侯于廣遂留家焉侯
性澹泊不尚侈靡所居解宇室無長物惟墊蔬數畦食取充
口衣取蔽體而已至於治民事無巨細必盡其心在廣之日
別廉吏均轉輸浚城隍撫馴士馬安戢逋逃號令既明而賞
罰必信遠邇翕然及臣身歿爭欲爲祠立石以頌其德者屬
有禁不可乃止侯嘗從元進士楊仲宏先生學賦詩氣豪才
贍而律調渾厚尤工七言晚自號蔗境翁詩數卷題曰蔗境
吟藁云於乎侯當草昧之初能卓然諗知天命攀附
聖主以自樹立可謂壯偉矣而用未臻其極功業不究當

時獨其善政在民者民不忘也瓊州守王君伯貞往來廣海
間得侯二子訪之又素知侯之惠愛不忍其泯也為序其事
以屬潛為之銘潛與王君皆泰和人也乃著其事之大槩吳
侯安慶人為殿中侍御史以歿其後無聞焉銘曰
民歷草竊窮奸偷及今其寧泰相繼言吞小噬病曷瘳正躬
惠民邦兩侯後先敷政何優游隱紆伸暴帖柔回適海濱
嗟相羞嗟哉我侯古罕儔衣被寵光壯醪猷澤流盈溢爵
未優身永逝矣名無休

襄城伯李公墓誌銘

王直

正統十二年十月廿五日襄城伯李公薨于位年五十五
上聞震悼為罷朝一日命禮部致祭工部為之設壇祭供壘
事公侯卿大夫士皆奔走弔哭凡諸將士嘗隸麾下者皆相

與會哭盡哀蓋公喜讀書明道理文謨武畧靡不究知其
君也忠其侍下也仁其制事也義其存心也恕是以上下痛
惜之如此公諱隆字惠平其先和州人祖旺生有奇材
太祖皇帝龍興之日常從征伐立戰功累官至燕山左衛副
千戶父濬又以軍功累至都指揮同知從
太宗皇帝靖難功多授奉天翊衛宣力武臣特進榮祿大夫
柱國襄城伯食祿一千石又以其爵封三代祖考妣及配皆
夫人公其長子也年十二襲爵雖甚少而負英偉之資雄傑
之材

上深器重之永樂庚寅以來每六師北伐輒命公領兵從
其應機發策出奇取勝雖老於行陣者亦多讓其能
上益奇之以為可大用丙申車駕留北京顧南京根本地

擇可任留守者莫如公遂命焉甲辰

仁宗皇帝卽位重北邊守備暫輟公南京命總兵鎮山海

凡東北邊關皆節制蓋礪若一長城虜爲之震懾未幾復還公南京洪熙乙巳

宣宗皇帝卽位眷念公厚而倚賴隆有白金文綺之

賜公祇敬將事夙夜盡心蓋未嘗有間

今上在東宮時知公忠勤宣德乙卯嗣大位又賜公白

金文綺而眷注尤篤正統庚申

上念禁衛重兵及諸司將士更番來京以備征調者雖有大

臣總之而才智明決如公者不可不在其位乃命豐城侯

代公還爲之副公在南京十八年荷

列聖知遇以爲股肱心膂褒嘉寵待之意具見所

賜敕前後幾二百道自古大臣得君之深而始終無間亦少

有如公者公行不違道而持之以誠小大之務必盡其公威

行惠施近悅遠懷是以其人雖有貴賤愚良寬鄙細粗不同

皆敬愛公如父母召還之日莫不願留而不可皆曰公去

矣吾何恃自都城至江上泣而送者相屬於路公得人如此

是豈以僞爲哉公之在朝雖總理軍政然謙已下賢務循大

體不苟爲異同嘗有詔舉將校之可任者公必慎擇以進

使必當其用有司黜陟臧否軍民皆公與兵部再閱不中者

例有罰公曰彼出自田里非素習然方壯顧教練何如教練

有法則怯可勇勇可使爲精兵由是鮮有罰者丙寅

命率師巡邊賜之鈔幣及寶刀一公曰軍事貴嚴寶刀之

賜意其在此吾豈敢不力然公威令素著及臨邊申飭守備

內外整肅訖還不戮一人

上閱武近郊公等各嚴兵以待戎陣整肅號令明審坐作進退皆中度

上喜各賜金織麟龍紵絲二有副公受賜惕然不自寧益思所以脩其職

朝廷或有政刑疑未決命文武大臣廷辯之公在其中侃侃正言犁然當於人心士大夫益重之以爲非獨將帥才也閒居手不釋卷古聖賢之言行皆服行不忘祿賜之外不妄取一錢嘗刻漢疏廣及唐盧坦之言以貽世訓諸子曰吾襲父爵四十年幽遠之情固多未達所行之事寧免過差然競競勵勵悔往脩來不敢欺公貪墨以負朝廷付託之重爾等宜益勉諸公取費氏崇信伯獻之女封

夫人無子女一嫁武安侯鄭宏側室子五人珍璉璵璠璿珍田氏出也女四人長未行次適興武衛指揮同知張鐫府軍衛指揮僉事胡全珍兄弟卜以是年十二月某日塋公於某之原太師英國公知公爲最深爲述其行珍奉來謁予求爲銘予亦荷公之知而慕公之德且悲公之不可復見也奚可辭嘗觀晉之卻縠以詩書禮樂將中軍晉是以大漢諸葛武侯不使有餘財以負昭烈君子謂爲大丈夫公庶乎是矣公自號湛然道人亦以自稱之於乎茲其所以爲湛然者歟公庸行之美見諸事者尚多不可以徧書姑序次其大者而系以銘銘曰

天佑

聖明賢俊挺生偉茲襄城邦家之禎維公額額歟有世澤旣

世其功亦世其德瑋璋之望熊虎之姿有武有文施無不宜
出則征行入則居守

天子曰來汝予左右公之在朝維一其忠不矯而異不翕而
同正直之言廉厚之行衆人所思君子所敬天不憝遺隕星
其堂壽不百年人奚不爲高貴哉我公安于此刻銘垂休焜
耀無已

知府葉公墓誌銘

公葉氏諱砥字周道更字履道蓋楚名臣沈諸梁之後以所
食采爲氏居南陽至晉有諱儉者爲括蒼太守因家焉其後
又徙上虞高祖萬曾祖明祖某父良玉皆不仕公天性明粹
喜讀書早喪母童氏又喪其父皆能以禮居喪不惑於流俗
嘗受學於鄞陳文昭樵李鮑仲孚二先生皆元老博學有

文章嘉公篤志爲之傾竭底裏由是與行大進洪武庚戌公
以明經取進士第得定襄縣丞兵荒之餘民未安業公勤於
撫字流亡來歸乙卯坐累謫涼州公處之泰然曰吾無愧於
心足矣日杜門爲學有詩寄子曰不須詢遠道窮達信乾坤
更號坦齋又號尋樂作賦以見志士大夫謫居邊者皆宗之
守將西寧侯宋晟亦延致家塾爲學師己卯求賢陝西按察
副使羅某臨江知府劉鵬上虞知縣李惟中皆薦其學宜任
史事遂起爲翰林編修有言其堪任風憲者復陞廣西按
察僉事用法平恕獄無冤滯吏畏而民愛之嘗兼綰三道印
出按郡至遷江會洞獠出沒爲寇害吏民洶洶欲遁去且
以無備諷公請少避公曰我去汝縣官必遁民何恃以安即
命料丁壯立保伍寇來併力禦之彼豈不畏死耶頃之報益

急公下令如故不爲動寇亦卒不敢至永樂初以史事被逮籍其家惟薄田弊廬故書數篋而已事白還之仍命與史事書成改考功郎中公進退人才品第高下小大各適其用尚書蹇公謂其年邁一以強鑑任之他不溷以事會修永樂大典徵天下名儒命公爲副總裁稽經考史無不愜當

仁宗皇帝在東宮緝熙聖學擇儒臣侍講論公預焉其言於上者必堯舜周孔之道非是不以陳爲郎中九年俾食四品祿職如故公重聽誤以爲授他職止親灑翰授之至今寶焉久之公引年求去不許乃自言於吏部曰砥老矣過蒙優禮猶叨祿在朝人將謂何

上若不棄願得一小郡牧小民庶效報萬一吏部以聞卽拜饒州知府公先教化後刑罰興利去害摧茲植桑民無愚良

皆愛之如子水旱爲災憂若已出每齋沐致禱必獲有年人

以爲德之應郡故有磁窰銅冶而丁調咸他郡公爲力言

於布政司得減四之一時方營造工之受役者當給糧贍其家布政司下饒州於遠輸內留八萬石給之公謂非戶部意不可衆譁然利其便請必從公終不許未幾部符下他已入倉者皆反之民使遠輸勞費彌甚衆乃服公明決皆拜謝布政司亦自愧其所行凡再述職京師皆以恤民隱革弊政去汙吏爲急然謂饒之風俗戾其民易化有訟者必以理論不付曹民知公之愛已也多悔悟而罷有婦代前夫子訟蓋欲資其後夫公揣知其故窮詰之以母子不忍爲詞公曰爾不忍於子何忍悖其父而從八邪婦慙裂狀逸去由是無理者不敢至其庭訟簡刑清民熙德焉戶口增至萬三千士之取

科第者加數倍於昔公年益高而燭理益明遇事亦若無足
爲者嘗賦詩以自適辛丑八月有疾作書戒子孫以睦宗族
和戚姻重義輕利毋貽譏於後世尤以不能報

國恩爲慊是月廿一日卒於郡解之正寢距其生元至正壬
午三月初六日享年八十有八鄉人無賢愚貴賤皆哭之哀諸孫
奉柩還以壬寅正月初六日禮葬上虞廿一都駱家嶺薛氏
墓山西麓配周氏賢而克家先公廿一年卒今合葬焉子男
二信可用可有士行皆早世孫男五綸早卒綬應州學正緯
以子貴封南京刑部主事綺先卒續湖廣東湖馬驛驛丞曾
孫男六壘充縣學生未仕冕取進士今爲松江知府嗣生蕃
佐佑曾孫女六皆嫁爲士人妻公平生爲文甚多號坦齋集
今所存者南行藁退朝藁芝山藁經進藁及經筵講義弟曾

道拙於治生無厚業婦家欲離婚公卽以已產益之終身不
復言其自處儉薄雖位望之重比封君而蕭然不異布衣時
人有過失婉詞誨諭使知改而止未嘗疾言遽色然內貞外
和雖詞氣寬平而所守有不可奪者博極羣書手不釋卷其
所著述必根於義理之正而有益於世教蓋於漢魏唐宋諸
大家無不學故其所立蔚然有盛名當世而可示法於後來
於乎公有德行文學之美而又兼政事之長誠一代之鉅人
君子矣葬三十五年而墓未有銘至是冕來京師以綬所爲
狀求予銘予從祖思明公同取洪武初科進士第及公來
翰林予亦忝從公後蓋於公舊矣則今銘墓奚可辭銘曰
葉氏之先實楚名臣源遠流長子孫振振暨公承之乃舉進
士奮迹文章揚譽政事經綏詞林 寵命自天堯舜是陳維

公則賢公既老矣

皇用殊錫加乃常祿仍乃顯秩公有誠言願守一州惠此羣黎庶幾寡尤湖山之間厥壤千里人之愛公不異其子公逝不留民心則悲豈弟之化百世之思我我新阡公安于此昭德有銘垂耀無已

教諭聶大年墓誌銘

大年聶氏世爲撫州臨川人曾祖某祖伯善皆不仕父同文洪武中取進士爲翰林侍書尋改中書舍人壬午六月太宗皇帝至京師時盛暑以迎鑾暍死於父卒後五月乃生母胡孺人撫育之天姿明爽穎悟絕人比長喜讀書日記數千言通詩書二經於詩子史無不讀尤喜古文及晉唐人詩書法歐陽趙松雪皆自臻其妙由是名動縉紳間用薦

起爲仁和訓導藩憲大臣與一時達官顯人過杭者皆禮重之而大年之文章傳於遠邇迎其母來杭旦夕率婦子備物以養必誠必孝母之心歡焉逾六年母卒奉柩歸窆哀感行路鄉邑耆老列言母賢行足以勵風俗而子又克孝如此詔旌表其門閭服闋分教常州府學滿九載陞仁和教諭仁和之人得大年復大喜敬愛逾往時大年乃言於有司修學校嚴學規訓勵彌切諸生日加親慕教用有成登第者彌衆賓興之歲諸藩省請典文衡者聘幣交走其門而多以後至不能得爲憾大年所至多得士人服其公凡所經歷處遇佳山水及古人遺跡必見諸賦詩聯爲大卷藏於家景泰六年

秋

朝廷有史事徵諸翰林將用之而大年以疾告退就醫樂凡

與善者數往來問候冀速愈而勢日危殆大年知不能起呼子章取紙筆書曰吾上負

朝廷之恩下負平生之志爾兄弟尚勉學爲士人擲筆而逝蓋景泰丙子二月二日也觀其所書如此則其抱負可知矣予初識大年於金谿王先生所又得其所作小瀛洲水竹居賦觀其詞翰而重其爲人真可謂奇偉非常之士也常思振起之使效用當時以其學行必有以名世傳後及被

召來京師心切爲喜思與之久處不厭而大年病予亦以老疾絕人事往還心雖相親而跡則踈矣大年病甚遣門生李昂持簡來言身後事蓋欲予銘其墓予聞而哀之不三日而大年卒矣於乎予豈忍銘吾友哉大年生於洪武壬午十二月初三日及其卒也享年五十又五配陳氏前守樂太守用

鳳之女有賢行四子女四孫男四大年有詩文四十卷多可傳者斯足以不朽矣章奉樞歸臨川將以某年某月某日葬某山之原予乃爲述其行而系其銘銘曰學足以爲人師才足以適事宜出旣逢時亦將有爲何天不勅遺而未究厥施嗚呼噫噫其誰不悲

墓誌銘

漫士高先生墓銘

林誌

永樂二十有一年二月三十日翰林典籍漫士高先生廷禮卒于南京之官舍年七十有四其子熟還櫬以葬于長樂縣崇丘里之半占山使致韓府長史楊曜宗狀來北京俾某為詞將以刻焉先生博學能文尤雄於詩雖談笑奮筆而精思力摹莫及蓋詩始漢魏作者至唐號為極盛宋失之理趣元滯於學識而不知由悟以入自襄城楊士弘始編唐音正始遺響然知之者尚鮮閩三山林膳部鴻獨倡鳴唐詩其徒黃玄周玄繼之以閩先生與皆山王恭起長樂頤頤齊名至今閩中推詩人五人而殘膏賸馥沾既者多黃終于校官周顯